


Cun preschientscha energica

■ (anr/ac) Entochen la fin dall'jamna ei ina schelta dallas lavurs da Michel Pfister da veser ella gallaira editionZ a Cuera. A prau cun l'exposiziun ei in catalog che porscha in'investa detagliada ella lavur digl artist sursilvan da casa dapi plirs decennis a Basilea cumparius. «Niev spazi» senumna l'exposiziun actuala ella gallaria editionZ da *Thomas Zindel* situada ella Vazerolgasse 6 a Cuera. Ella sededichescha all'ovra digl artist sursilvan cun dimora a Basilea, *Michel Pfister*. In'ovra carschida sur decennis e regularme in presenta el cantun Grischun. Parallel cun l'exposiziun actuala ei in catalog che porscha in'investa detagliada ella lavur digl artist cumparius. La gallarista da Domat, *Ginia Holdener*, scriva ell'introducziun dil catalog dad ina pissiun digl artist per il lenn che surpassi igl aspect purmein manual per bia. Alla lavur dil bab da Pfister sco scrinari a Vuorz attribuescha igl artist sia pissiun pil lenn

e tenor las explicaziuns da Holdener poseda quei material ina gronda varietad pil diever d'art che seigi aunc gitg buca limitada. L'intenziun da Pfister schai in in'intensiva occupaziun cun spazi, object ed architectura. Sias intervenziuns seigien drizzadas allas cundiziuns dil liug. La veglia da sefatschentar cun las circumstanzias avon maun lubeschi agl artist, suenter different ed intensiv pass da lavur, da scaffir ina historia communabla denter object e spazi. Sias intervenziuns posseden la finamira da conto-scher in effect maximal via ina intervenziun minimala, scriva la gallarista da Domat.

Detags digl effect maximal via intervenziun minimala da Michel Pfister porscha la gallaria editionZ entochen sonda, ils 28 da settember. Aviarta ei l'exposiziun mintgamai la mesjamna ed il vendergis dallas 14.00 entochen allas 17.00 ni la sonda dallas 13.00 entochen allas 16.00.



Michel Pfister ei presents entochen la fin dall'jamna cun in'exposiziun singula ella gallaria editionZ a Cuera.